

PEMUJUR GRADUET UNIMAS BULIH PENGAWA BA MAKIT KEREJA DISADANG NAMBAH 80 PERATUS

November 12, 2016, Saturday
Dikarang Jacqueline R. David//

The Borneo Post



AUM MEDIA: Kadim (dua kanan) benung mantaika penerang ngagai raban pemberita beserimbai enggau pengerami Konvokesyen UNIMAS ke-20.

KUCHING: Mandal Chanselor UNIMAS Profesor Datuk Dr Mohamad Kadim Saudi madah penyampau nya dipelabaka nambah ngagai 80 peratus ba ujung taun tu.

Kenu ku iya, naka Oktober taun tu, nyauka 70 peratus graduan Universiti Malaysia Sarawak (UNIMAS) mujur teulihka pengawa pengudah nembuka pelajar sida di UNIMAS.

“Pengulih graduan UNIMAS teulihka pengawa naka bulan sebedau Konvokesyen 2016 tu nyapai urung 70 peratus lalu kami andal ujung taun tu, penyampau nya ulih nyapai 80 peratus.

“Ba aku, penyampau nya tau endar dikumbai pemujur, laban lebu nemiak nembuka pelajar sida iya, enda semua ke deka terus gawa.

“Bisi sekeda nya gawa terus, sekeda nya deka nyambung belajar baru, lalu ke bukai agi deka bejalai dulu...,” ku Mohamad Kadim madah ba aum media pengudah bejaku pasal Konvokesyen ke-20 UNIMAS.

Taja pia, iya madah pengulih graduan UNIMAS bulih pengawa di makit kereja diatu bepanggai ba kus ke diambi sida iya, ambika chunto ku iya, baka nemiak ke ngambi kus pasal lutur tauka berubat tauka kus nyadi misi, sigi muntang bulih pengawa.

Kus bukai baka Injinir, Sain Komputer enggau teknologi nyauka 80 peratus deka bulih pengawa pengudah nembuka kus diri.

“Graduan disiplin bukai baka Sains Sosial enggau Seni, nyangka bisi betapi enggau penanggul mimit tang kami enda irau laban sida tu dilatih enggau pengelandik ngambika sida iya muntang gawa ba endur ke bisi bekait enggau pengelandik diri,” ku iya.

Tu laban, ku iya, pemerat tuju UNIMAS, nyendiaka nemiak ke holistik lalu ulih begulai enggau komuniti endur nya tauka komuniti luar.

Ketegal pemerat nya ku Mohamad Kadim, UNIMAS ku iya, ngembuan kaul ke terit enggau pemerat industri baik nya industri menua tu tauka menua luar.

“Kami nyengkaum industri sereta sida ke bisi pemerat dalam merambu kus tauka disiplin ti bisi disediaka ulih UNIMAS ngambika graduan ke udah mujur nya, ngembuan pengulih makit ke besai,” ku iya.

Mohamad Kadim mega madahka UNIMAS bisi bulih geran RM1 juta ari Opis Perbadanan Perusahaan Kayu Sarawak (PUSAKA), ke begunaka graduan UNIMAS bejalai pengawa pansik sereta ngemansangka chura tauka ukir ngaga kerusi mija nengah baruh jaga opis nya.